

四庫全書

子部

欽定四庫全書

子部
冊府元龜卷八百九十七至八百

詳校官中書臣孫球

侍讀臣孫球覆勘

總校官庶吉士臣何思鈞

校對官助教臣胡子襄

謄錄監生臣鍾廷瑛

欽定四庫全書

冊府元龜卷七百九十七

宋 王欽若等 撰

總錄部

博物

古之學詩者多識於鳥獸草木之名其博物之謂乎且
品彙之衆賦象各異小大隱見變化紛紜方輿廣厚靡
所不載或總括地志或傳流人間遠者隔越九州曠絕
千載幽者埋沒泉壤磨滅篆刻不時而出是為竒恠眩

感衆視莫質所疑苟非智贖萬殊識洞羣性洽聞強記
目擊道存則何以徧閱名數周察毫芒別白臧否如指
諸掌謂之君子不其然乎

管仲字夷吾為齊桓公相桓公北征孤竹未至卑耳之

谿十里闐然立矐然視

闐坐立貌
矐驚視貌

援弓將射引而未發

謂左右曰見是前人乎左右對曰不見也公曰事其不
濟乎寡人大惑今者寡人見人長尺而人物具焉冠右
袂衣走馬前疾事其不濟乎寡人大惑豈有人若此者

乎管仲對曰臣聞登山之神有俞兒者長尺而人物具
焉霸王之君興而登山之神見且走馬前道也祛衣示
前有水也右祛衣示從右方涉也至卑耳之谿有贊水

者

謂贊引
渡水者

曰從左方涉其深及冠從右方涉其深至膝

已涉其大濟桓公坐拜管仲之馬前曰仲父之聖至若

此寡人之抵罪也久矣

抵當也 不知仲父之聖
是寡人當有罪久矣

管仲對

曰夷吾聞之聖人先知無形今已有形而後知之臣非

聖也善承教也

善承古人
之教也

介葛盧介國之君也葛盧聞牛鳴曰是生三犧皆用之

矣其音云問之而信

言人聽或通鳥獸之情

展禽柳下季也爲魯士師海鳥爰居止於魯東門之外

三日臧文仲使國人祭之

文仲不知以為神

展禽曰越哉臧孫

之為政也

越迂也言迂闕不知政要也

夫祀國之大節也而節政之

所成也故慎制祀以為國典今無故而加典非政之所

宜也夫聖王之制祀也功施於民則祀之以死勤事則

祀之以勞定國則祀之以能禦大災則祀之能捍大患

則祀之非是族也不在祀典今海鳥至矣不知而祀之
以為國典難以為仁且智矣夫仁者講功智者處物無
功而祀之非仁也不知而不問非智也今茲海其有灾
乎夫廣川之鳥獸常知而避其災是歲也海多大風冬

煖

爰君之
所避也

臧文仲聞柳下季之言使書以為三筮

筮簡
書也

三筮三卿三通也
謂司馬司徒司空

公孫僑字子產為鄭大夫晉平公有疾鄭伯使公孫僑
如晉聘且問疾叔向問焉曰寡君之疾病卜人曰實沈

臺駘為祟史莫之知敢問此何神也子產曰昔高辛氏

有二子伯曰閼伯季曰實沈高辛帝嚳居于曠林不相能也

曠林地闕日尋干戈以相征討尋用也后帝不臧后帝堯也遷

閼伯于商丘主辰商丘宋地主祀辰星辰大火也商人是因故辰為商

星商人湯先相土封商丘遷實沈于大夏主參大夏今晉陽縣

唐人是因以服事夏商唐人若劉累之等累其季世曰

唐叔虞唐人之季世當武王邑姜方震大叔邑姜武王后齊太公

之女懷胎為震大夢帝謂已曰命而子曰虞帝取唐君之名將

與之唐屬諸參而蕃育其子孫及生有文在其手曰虞

遂以命之及成王滅唐而封大叔焉故參為晉星

叔虞封唐

是為晉侯

由是觀之則實沈參神也昔金天氏有裔子曰昧

為玄冥師生允格臺駘

金天氏帝少皞遠裔也玄冥水官昧為水官之長

臺駘

能業其官

纂昧之業

宣汾洮

宣猶通也洮洮二水名

障大澤

障障之

以處

太原

太原晉陽也臺駘之所居

帝用嘉之封諸汾川

帝顓頊

沈姒蓀黃

實守其祀

四國臺駘之後

今晉主汾而滅之矣

滅四國

由是觀之

則臺駘汾神也抑此二者不及君身山川之神則水旱

癘疫之灾於是乎禳之

有水旱之灾則禳祭山川之神若臺駘者周禮曰禳祭也禳攢

用幣以祀羣神

山川星辰之神則雪霜風雨之不時於是乎禳

之星辰之神若實沈者

若君身則亦出入飲食哀樂之事也山川

星辰之神又何為焉

言實沈臺駘不為君疾

僑聞之君子有四時

朝以聽政

聽國政

晝以訪問

問可否

夕以脩令

令所施

夜以安

身於是乎節宣其氣

宣散也

勿使有所塞閉湫底以露其

體

湫集也底滯也露羸也閉塞則血氣集滯而體羸露

茲心不爽而昏亂百度

此

也爽明也百度百事之度

今無乃一之

同四時也

則生疾矣僑又聞之內

官不及同姓

內官嬪御

其生不殖

殖長也

美先盡矣則相生疾

同姓之相與先美矣美極則盡盡則生疾

君子是以惡之故志曰買妾不知

其姓則卜之違此二者古之所慎也

一四時二取同姓二者古人所慎

男

女辨姓禮之大司也

辨別也

今君內實有四姬焉

同姓姬四人

其無乃是也乎若由是四者弗可為也已

為治也

四姬有

省猶可無則必生疾矣乎

據異姓去同姓故言省

叔向曰善哉胥

未之聞也此皆然矣晉侯聞子產之言曰博物君子也

重賄之後七年子產復聘于晉晉侯有疾韓宣子逆客

私焉

私語

曰寡君寢疾於今三月矣並走羣望

晉所望祀山川皆走

往祈

有加而無瘳今夢黃熊入於寢門其何厲鬼也對

曰以君之明子為大政其何厲之有昔堯殛鯀于羽山

羽山在東海祝其縣西南

其神化為黃熊以入于羽淵寔為夏郊三

代祀之

鯀禹父夏家郊祭之歷殷周二代又通在羣神之數并見祀

晉為盟主其或

者未之祀乎

言周哀晉為盟主得佐天子祀羣神

韓宣子祀夏郊

祀

晉侯

有間賜子產莒之二方鼎

方鼎莒所貢

蔡墨晉太史昭公二十九年頃公時龍見于絳郊

絳晉國都

魏獻子問於蔡墨曰吾聞之蟲莫知於龍以其不生得

也謂之知信乎對曰人寔不知非龍寔知

言龍無知乃人不知之耳

古者畜龍故國有豢龍氏有御龍氏

豢御養也

獻子曰是二

氏者吾亦聞之而不知其故是何謂也對曰昔有颺叔

安

颺古國名叔安其君名

有裔子曰董父

裔遠也玄孫之後為裔

寔甚好龍

能求其嗜欲以飲食之龍多歸之乃擾畜龍以服事帝

舜帝賜之姓曰董氏曰豢龍

豢龍官名官有世功則以官氏

封諸豸川

豸夷氏其後也

豸水上夷皆董姓

故帝舜氏世有畜龍及有豸

孔甲擾于有帝

孔甲少康之后九世君也其德能順於天

帝賜之乘龍河漢

各二各有雌雄孔甲不能食而未獲豢龍氏有陶唐氏

既衰其後有劉累

陶唐堯所治也

學擾龍於豢龍氏以事孔甲

能飲食之夏后嘉之賜氏曰御龍

夏后孔甲

以更豕韋之後

更代也以劉累代彭姓之豕韋累尋遷魯縣豕韋復國至商而滅累之後世復承其國為豕韋氏在襄公二十

四年龍一雌死潛醢以食夏后

潛藏也藏以醢明龍不知

夏后享之

既而使求之

求致龍也

懼而遷于魯縣

不能致龍故懼遷魯縣自貶退也魯縣今

魯陽范氏其後也

仲尼魯人季桓子穿井得土缶中石羊

羊生羊也故謂之恠也故問

仲尼云得狗

獲羊而言狗者以孔子博物則知之

仲尼曰以丘所聞羊也

丘聞之木石之恠夔魍魎

木石謂土也或云夔一足越人謂之山魍也或言燭是魍

魍山精好學人聲而迷惑人也

水之恠龍罔象

龍神獸也非常見故曰恠或云罔象食人一名

沐腫土之恠羴羊

羴羊雌雄未成者也

吳王夫差伐越墮會稽

墮毀也

得骨節專車

骨一節其長專車專擅也

王使使問仲尼骨何者最大

仲尼曰禹致羣神於會稽山

羣神謂主山川之君為羣神之主故謂之神也

防

風氏後至禹殺而戮之

防風氏違命後至故禹殺之陳尸為戮

其骨節專車

此為大矣吳客曰誰為神仲尼曰山川之神足以綱紀

天下其守為神

守山川之祀者為神謂諸侯也足以綱紀天下守名山大川能興雲致雨以利

天下

社稷為公侯

但守社稷無山川之祀者直為公侯而已

皆屬於王者客

曰防風何守仲尼曰汪罔氏之君守封禺之山

封封山禺禺山

在吳郡永安縣晉太康元年改永安為武康縣屬吳興郡

為釐姓在虞夏商為汪罔

於周為長翟今謂之大人

周之初及書孔子之時其名異也

客曰人長

幾何仲尼曰焦僂氏三尺短之至也

焦僂西南蠻之別名也在三秦國也

長者不過十之數之極也

十之謂三文也數極於此

於是吳客曰善

哉聖人在陳湑公時有隼集於陳庭而死楛矢貫之弩

矢長尺有咫

隼鷲鳥今之鷲也楛矢名砮鏃也以石為之八寸曰咫楛矢貫之墜而死

公使

使問仲尼仲尼曰隼來遠矣此肅慎氏之矢昔武王克商

通道九夷百蠻

九夷東方有九種也百蠻夷狄之百種

使各以其方賄來

貢

各以其國所有之物而來貢

使無忘職業於是肅慎貢楛矢石弩

長尺有咫先王欲昭其令德以肅慎矢分大姬

大姬武王女也

配虞胡公而封諸陳分同姓以珮玉展親

展重也王謂若夏后氏之

類

分異姓以遠方職貢使無忘服

使無忘服從於王也

故分陳以

肅慎矢試求之故府果得之

故府舊府也

漢東方朔武帝時為郎建章宮後閣重櫺中有物出焉其狀似麋以聞帝往臨視之問左右羣臣習事通經術者莫能知詔東方朔視之朔曰臣知之願賜美酒粱飯大飧臣臣朔乃言詔曰可已飧又曰某所有公田魚池蒲葦數頃陛下以賜臣臣朔乃言詔曰可於是朔乃言曰昔所謂騶牙者也遠方當來歸義而騶牙先見其齒前後若一齊等無牙故謂之騶牙其後一歲餘匈奴混

邪王果將十萬衆來降漢乃復賜東方朔錢財甚多

終軍為孝廉郎武帝時得豹文鼯鼠軍知之賜絹百疋

張敞為京兆尹宣帝時美陽得鼎獻之美陽扶風之縣也下有

司議多以為宜薦見宗廟如元鼎故事敞好古文字案

鼎銘勒而上議曰臣聞周祖始乎后稷后稷封豶豶今武功

故城是也公劉發迹於邠今邠州是也太王建國於邽梁梁山在邽山之

東九峻之西非夏陽之梁山也文武興於鄠鎬鄠今長安城西澧水是也鎬在昆明池傍也

由此言之則邽梁鄠鎬之間周舊居也固宜有宗廟壇場

祭祀之藏今鼎出於郊東中有刻書曰王命尸臣官此

栒邑

尸主事之臣也栒邑即邠地也

賜爾旂鸞黼黻琫戈

蛟龍為旂鸞謂有鸞之車

飾也黼黻冕服也琫戈刻鏤也

尸臣拜手稽首曰敢對揚天子丕顯休

命臣愚不足以迹古文竊以傳記言之此鼎殆周之所

以褒賜大臣大臣子孫刻銘其先功藏之宮廟也昔寶

鼎之出於汾睢也河東太守以聞詔曰朕巡祭后土祈

為百姓蒙豐年今穀曠未報

曠少意也言穀稼尚少未獲豐年也

鼎焉為

出哉博聞耆老意舊藏與

言鼎宜舊藏今此城

誠欲考得事實也有

司驗睚上非舊藏處鼎大八尺一寸高三尺六寸殊異

於衆鼎今此鼎細小又有欵識

款識列記也

不宜薦見於宗

廟制曰京兆尹議是

後漢賈逵多智思明帝永平中有神雀集宮殿官府冠

羽有五采色明帝異之以問臨邑侯劉復復不能對薦

逵博義多識帝乃召見逵問之對曰昔武王終父之業

驚驚在岐宣帝威懷戎狄神雀仍集此胡降之徵也帝

勅蘭臺給筆札使作神雀頌拜為郎與班固並校祕書

應對左右遠位至侍中

魏王粲為侍中漢末喪亂絕無玉珮粲識舊珮始復作之今之玉珮受法於粲也

管輅字公明平原人時劉邠為平原太守邠謂輅曰此郡官舍連有變恠多形使人怖恐君似當達此數者厥理何由輅言此郡所以名平原者本有原山無木石與地自然含陰不能吐雲含陽不能激風陰陽雖弱猶有微神微神不真多聚凶姦以類相求魍魎成羣或因漢

末兵馬擾攘軍尸流血染污丘嶽彊魂相感變化無常
故因昏夕之時多有恠形也昔夏禹文明不恠於黃龍
周武信時不惑於暴風今明府道德高妙神不懼妖自
天祐之吉無不利願安百祿以光休寵也邠曰聽雅論
為近其理每有變恠輒聞鼓角聲音或見弓劍形象夫
以土山之精伯有之魂實能合會干犯明靈也邠問輅
易言剛健篤實輝光日新斯為同不也輅曰不同之名
朝旦為輝日中為光

晉張華字茂先范陽方城人也雅愛書籍身死之日家

無餘財惟有文史溢于几篋

苦叶切

嘗徙居載書三十乘

祕書監摯虞撰定官書皆資華之本以取正焉天下奇

祕世所希有者悉在華所由是博物洽聞世無與比惠

帝中人有得烏毛長三丈以示華華見慘然曰此謂海

鳧毛也出則天下亂矣陸機嘗餉華鮓于時賓客滿座

華發器便曰此龍肉也衆未之信華曰試以苦酒濯之

必有異既而五色光起機還問鮓主果云園中茅積

紫賜

反
下得一白魚質狀殊常以作鮓過美故以相獻武庫

封閉甚密其中忽有雉雝華曰此必蛇化為雉也開視

雉側果有蛇蛻

舒萬反
託卧反

馬吳郡臨平岸崩出一石鼓槌

之無聲帝以問華華曰可取蜀中桐材刻為魚形扣之
則鳴矣如其言果聲聞數里初吳之未滅也斗牛之間

常有紫氣道術者皆以吳方強盛未可圖也惟華以為
不然及吳平之後紫氣愈明華聞豫章人雷煥妙達緯
象乃要煥宿屏人曰可共尋天文知將來吉凶因登樓

仰觀煥曰僕察之久矣惟斗牛之間頗有異氣華曰是何祥也煥曰寶劍之精上徹於天耳華曰君言得之吾少時有相者言吾年出六十位登三事當得寶劍佩之斯言豈效歟因問曰在何郡煥曰在豫章豐城華曰欲屈君為宰密共尋之可乎煥許之華大喜即補煥為豐城令煥到縣掘獄屋基入地四丈餘得一石函光氣非常中有雙劍並刻題一曰龍泉一曰太阿其夕斗牛間氣不復見焉煥以南昌西山北巖下土以拭劍光芒豔

發大盆盛水置劍其上視之者精芒眩目遣使送一劍
并土與華留一自佩或謂煥曰得兩送一張公豈可欺
乎煥曰本朝將亂張公當受其禍此劍當繫徐君墓樹
耳靈異之物終當化去不久為人服也華得劍寶愛之
常置坐側華以南昌土不如華陰赤土報煥書曰詳觀
劍文乃干將也莫邪何復不至雖然天生神物終當合
耳因以華陰土一斤致煥煥更以拭劍倍益精明華誅
失劍所在煥卒子華為州從事持劍行經延平津劍忽

於腰間躍出墮水使人沒水取之不見劍但見兩龍各長數丈蟠縈有文章沒者懼而反須臾光彩照水波浪驚沸於是失劍華乃曰先君化去之言張公終合之論此其驗矣華之博物多類此不可詳載

東晉為尚書郎有人於嵩高山下得竹簡一枚上兩行科斗書傳以相示莫有知者司空張華以問晉曰此漢明帝顯節陵中策文也較驗果然

後趙續咸石勒時為建德校尉王和參軍和掘得負石

銘曰律權石重四均同律度量衡有新氏造議者未詳
或以為瑞咸曰王莽時物也其時兵亂之後典度湮滅
遂命下禮官為準程定式

前秦苻朗為青州刺史降于晉朗善識味鹹酢及肉皆
別所由會稽王司馬道子為朗設盛饌極江左精餽食
訖問曰關中之食孰若此答曰皆好惟鹽味小生耳既
問宰夫皆如其言或人殺鷄以食之既進朗曰此鷄棲
恒半露檢之皆驗又食鵝肉知黑白之處人不信記而

試之無毫釐之差時人咸以為知味

宋何承天博通古今為時所重張永開玄武湖遇古冢冢上得一銅斗有柄文帝以訪朝士承天曰此亡新威斗王莽三公亡皆賜之一在冢外一在冢內時合葬江左者唯甄邯為大司徒必邯之墓俄而又啟冢內更得一斗復有一石銘曰大司徒甄邯之墓承天位至御史

中丞

南齊王僧虔高祖初為撫軍將軍文惠太子鎮襄陽時

有盜發古冢者相傳云是楚王家大獲寶物玉屐玉屏
風竹簡書青絲編簡廣數分長二丈皮節如新後人有
得十餘簡以示僧虔云是科斗書考工記周官所闕文
也

陸澄領國子祭酒竟陵王子良得古器小口方腹而底平
可容七八升以問澄澄曰此名服匿單于以與蘇武子
良後視器底有字髣髴可識如澄所言

賈淵字希鏡宋孝武世青州人發古冢銘曰青州世子

東海女郎帝問學士鮑昭徐爰蘇寶生並不能悉淵對曰此是司馬越女嫁荀晞兒檢訪果然由是見遇淵明帝時終北中郎將軍

梁劉顯為中書侍郎與裴子野顧協連職禁中顯博聞強識過於裴顧時人獻古器有隱起字無能識者顯視文讀之無有滯礙考校年月一字不差高祖甚嘉焉

後魏高祐為侍郎文成末兗州東郡吏獲一異獸送之京師時人咸無識者詔以問祐祐曰此是三吳所出厥

名鮫鯉餘域率無今我獲之吳楚之地其有歸國者乎
又有人於零丘得玉印一以獻詔以示祐祐曰印上有
籀書二字文曰宋壽壽者命也我獲其命亦是歸我之
徵獻文初宋文帝子義陽王昶來奔薛安都等以五州
降附時謂祐言有驗

祖瑩為散騎侍郎孝明孝昌中於廣平王第掘得古玉
印勅召瑩與黃門侍郎李琰之辨之瑩云此是于闐國
晉太康中所獻乃以墨塗字觀之果如瑩言時人稱為

博物

北齊徐之才博識多智時有以骨為刀子靶者五色斑
斕之才曰此人瘤也問得處云於古冢見髑髏骨長數
寸試削視有文理故用之其明悟多通如此官累至尚
書左僕射

後周斛斯徵為太常少卿時梁春平蜀得樂器人皆莫
之識徵見之曰此罇于也人弗之信徵遂依干寶周禮
注以芒筒將之其聲極振衆乃歎服徵取以合樂焉

隋崔頤煬帝時為起居舍人大業初從駕幸汾陽宮次
河陽鎮藍田令王曇於藍田山得一玉人長三尺四寸
著大領衣冠幘奏之詔問羣臣莫有識者頤答曰謹案
漢文已前未有冠幘即文帝以來所作也臣見魏大司
農盧元明撰嵩山廟記云有神人以玉為形象長數寸
或出或隱則令世延長伏惟陛下應天順人定鼎嵩維
岳神自見臣敢稱慶因再拜百官畢賀天子大悅賜縑
二百疋

冊府元龜卷七百九十七

欽定四庫全書

冊府元龜卷七百九十八 宋 王欽若等撰

總錄部

勤學

書曰業廣惟勤傳曰民生在勤勤則不匱矧乃服膺素業講求善道時習而悅日知所亡稽古之能進以之干祿多聞之益居以之待問自非研精覃思探蹟索隱勵拳拳之志罄孜孜之力又曷以覩聖人之奧垂沒世之

名者哉故尼丘立訓詁殆忘寢食由茲以來學者間出
乃有閉關刻意閱市周覽刺膚以忘其痛攻苦而安於
貧求師以涉遠遭難而不懈在戎旅而無廢雖老耄而
彌篤莫不練達古今該悉元本磅礴經義蔚為儒宗以
之涖事而無煩以之誨人而不倦上之則宣化而成俗
內之則懷寶而獨善是故大禹之聖惜乎寸陰閔子之
戒慮其將落者此之謂乎

孔子晚而學易序彖繫象說卦文言讀易韋編三絕曰

假我數年若是我於易則彬彬矣又曰吾嘗終日不食
終夜不寢以思無益不如學也又曰十室之邑必有忠
信如丘者焉不如丘之好學也後為魯司寇

顏回孔子弟子為人擇乎中庸得一善則拳拳服膺而
弗失之哀公問孔子弟子孰為好學孔子對曰有顏回
者好學不遷怒不貳過不幸短命死矣今也則亡未聞

好學者也

凡人任情顏回任道怒喜怒遷移也不遷怒者怒當其理不移易也不貳過者有不善未

嘗復

行

孔文子為衛大夫敏而好學不耻下問

名圉
諡文

甯越中年之鄙人苦耕稼之勞謂其友曰何為而可以免此苦也其友曰莫如學學三十年則可以達矣越曰請以十五歲人將休吾不休人將卧吾不卧學十五歲而周威公師之

蘇秦東周人發書陳篋數十得太公陰符之謀伏而誦之讀書欲睡引錐自刺其股血流至踵曰安有說人主不能出其金玉錦繡取卿相之尊者乎後用此結從約

佩六國相印

漢孔安國貧無資用嘗為弟子都養

都凡衆也養主給烹炊者也貧無資

用故供諸弟子烹炊也

時行賃作帶經而鉏休息輒讀其精如此

後為臨淮太守

賈嘉賈誼之孫最好學官至郡守

董仲舒少治春秋蓋三年不窺園其精如此為江都相
後復相膠西去位歸居終不問家產以脩學著書為事
黃霸守丞相長史坐公卿大議庭中知長信少府夏侯

勝非議詔書大不敬阿從不舉劾皆下廷尉繫獄當死

霸因從勝受尚書獄中再踰冬積三年迺出

霸欲從勝受尚書勝

辭以罪死霸曰朝聞道夕死可矣勝賢其言遂授之繫再冬講論不怠後赦得出

後至丞相

王尊字子贛少孤歸諸父使牧羊澤中尊竊學問能史

書年十三求為獄小吏數歲給事太守府問詔書行事

尊無不對太守奇之除補書佐署守屬監獄

署為守屬令監獄主

因久之尊稱病去事師郡文學官

郡有文學官而尊事之以為師

治尚

書論語略通大義後官至東郡太守

路溫舒字長君父為里監門使溫舒牧羊舒取澤中蒲

截以為牒編用寫書

小簡曰牒
編聯次之

稍習善求為獄小吏因

學律令轉為獄吏縣中疑事皆問焉太守行縣見而異
之署決曹吏又受春秋通大義舉孝廉為山邑丞後至
臨淮太守

劉向專積思於經術晝誦書傳夜觀星宿或不寐達旦
後至中壘校尉

龔舍字君倩與龔勝相友少皆好學明經楚王入朝聞

舍高名聘舍為常侍固辭願卒學復至長安

終其後徵經業

為諫議大夫

後漢魏應少好學光武建武初詣博士受業習魯詩閉門誦習不交僚黨京師稱之後為騎都尉

魯恭年十五與母弟俱居太學習魯詩閉戶講誦絕人間事兄弟俱為諸儒所稱學士爭歸之太尉趙熹慕其志每歲時遣子問以酒糧皆辭不受後至司徒

魯丕性沉深好學孜孜不倦遂杜絕交游不答候問之

禮士友嘗以此短之而不欣然自得遂兼通五經以魯詩尚書教授為當世名儒後歸郡為督郵功曹郡將無不師友待之後為侍中左中郎將

承宮少孤年八歲為人牧豕鄉里徐子盛者以春秋經授諸生數百人宮過盛廬下棄其業因就聽經遂請留

門下宮過徐子盛好之因棄其豕而留聽經牧主恠其不還求索得官欲答之門下生共禁止因留之

為諸生拾薪執苦數年勤學不倦後至侍中祭酒

桓榮少好學游長安習歐陽尚書事博士九江朱普朱普

字公文受業於平當當貧窶無資嘗客傭以自給精力不為博士徒衆尤盛

倦十五年不窺家園榮初遭倉卒與族人桓元卿同飢庀而榮講誦不息元卿嗤榮曰但自苦氣力何時復施用乎榮笑不應及為太常元卿歎曰我農家子豈意學之為利乃若是哉後為五更封闕內侯

崔瑗年四十餘始為郡吏以事繫東郡發干獄發干縣獄也

獄掾善為禮瑗間考訊時輒問以禮說其專心好學雖顛沛必於是後為濟北相

竇章遭羌寇避難東國家於外黃居貧蓬戶蔬食講
讀不輟後為大鴻臚

高鳳少為書生家以農為業而專精誦讀書夜不息妻
嘗之田曝麥於庭令鳳護鷄會天暴雨而鳳持竿誦經
不覺潦水流麥妻還怪問鳳方悟之其後遂為名儒乃
教授業於西唐山中自言農家子不應為吏

侯瑾少孤貧依宗人居性篤學嘗傭作為資暮還輒藝
薪以讀書公車徵不至

宋均以父任為郎時年十五好經書每伏日輒詣博士受業通詩禮善論難後至河內太守

王充受業太學師事扶風班彪好博覽而不守章句家貧無書嘗游雒陽市肆閱所賣書一見輒能誦憶遂博通衆流百家之言後歸鄉里屏居教授

朱穆耽學銳意講誦或時思至不自知亡失衣冠顛墜阮岸其父暉嘗以為專愚幾不知數馬足穆愈更精篤後至尚書

樂恢長好經學事博士焦永永為河東太守恢隨之官
閉廬精誦不交人物後永以事被拷諸家弟子皆以通
關被繫恢獨皎然不污於法遂篤志為名儒後至尚書
僕射

曹褒少篤志有大度結髮傳父充業博雅疏通尤好禮
士嘗憾朝廷制度未備慕叔孫通為漢禮儀晝夜研精
沉吟專思寢則懷抱筆札行則誦習文書當其念至忘
所之適後至侍中

郎顛明經典隱居海畔延致學徒嘗數百人晝研經義
夜占象度勤心銳意朝夕無倦公車再徵不行

衛颯家貧好學問隨師無糧嘗傭以自給後至桂陽太
守

甄承尤篤學未嘗視家事卒於梁相

李固司徒邵之子少好學嘗步行尋師不遠千里

又司馬彪

續漢書載固少有俊才雅志學為三公子嘗躬步驅驢負書隨師後至太尉

杜喬累世吏二千石少好學治韓詩京氏易歐陽尚書

以孝稱雖二千石子嘗步擔求師後至太尉

陳寔少作縣吏嘗給事廝役後為都亭刺史佐而有志好學坐立誦讀縣令鄧邵試與語竒之聽受業太學後令復召為吏乃避隱陽城山中後至太丘長

崔琦嘗耕於陌上懷書一卷息輒偃而詠之後至臨濟長

荀爽幼好學耽思經籍慶弔不行徵命不應後至司空魏隗禧字子牙世單貧少好學漢初平中三輔亂禧南

客荊州不以荒擾擔負經書每以樵採餘日則誦習之
後至郎中

董遇字季直性質訥而好學漢興平中關中擾亂與兄
季中依將軍段煨遇採梠負販而常挾持經書投閑習
讀其兄笑之而遇不改後為侍中大司農

吉茂世為著姓好書不耻惡衣惡食而耻一物之不知
漢建安初關中始平茂與扶風蘇則共入武功南山隱
處精思數歲州舉茂才除臨汾守

袁遺字伯業曹公稱長大而能勤學者惟吾與袁伯業耳後為揚州刺史

趙昱少時就處士東莞綦毋君受公羊傳兼該羣業至歷年潛志不窺園圃親疏希見其面時入定省父母須臾即還後為漢陵太守

賈逵為諸生畧覽大義取其可用最好春秋左傳及為牧守常課績之月常一遍後至豫州刺史

司馬孚溫厚廉讓博涉經史漢末喪亂與兄弟處危亡

之中單食瓢飲而披閱不倦後至太尉

鍾會有才能技藝而博學精練名理以夜繼晝由是獲聲譽後至鎮西將軍

常林少單貧性好學為諸生帶經耕鋤後至光祿大夫王象少孤為人僕隸年十七見使牧羊而私讀書後領秘書監

蜀向朗少時涉獵文學更乃潛心典籍孜孜不倦年踰八十猶手自校書後至左將軍位特進

譙周幼孤與母兄同居既長耽古篤學家貧未嘗問產
業誦讀典籍忻然獨笑以忘寢食後至光祿大夫入晉
至散騎常侍

郗正本名纂少而父死母嫁單瑩隻立而安貧好學博
覽墳典弱冠能屬文後至秘書令入晉為巴西太守

吳步騭字子山世亂避難江東以種瓜自給晝勤四體
夜誦經傳後至丞相

魯肅為人方嚴寡於玩飾雖在軍中手不釋卷後至偏

將軍

闕澤字德潤家世農夫至澤好學居貧無資為人傭書以供紙筆寫書既畢誦讀亦遍追師諭講究覽羣籍兼通歷數由是顯名後為太子太傅

張紘居貧躬耕帶經而鋤孜孜汲汲以夜繼日至于弱冠無不窮覽後為孫權長史

晉劉寔自幼及老篤學不倦雖居職務卷弗離手弟智貞素有兄風少貧寔每負薪自給讀誦不輟竟以儒行

稱

晉中興書載寔精學不倦雖居官職至于皓首手不釋卷

後至太尉

華譚好學不倦爽慧有口辨為鄰里所重後至散騎常

侍

東哲字廣微少遊國學或問博士曹志曰當今好學者誰乎志曰陽平東廣微好學不倦人莫及也後為尚書

郎

皇甫謐耽翫典籍忘寢與食時人謂之書淫或有箴其過篤將損耗精神謐曰朝聞道夕死可矣況命之修短

分定懸天乎徵議郎又召補著作郎並不應

石崇為陽城太守在郡雖有職務好學不倦

魯芝字世英父為郭汜所害芝襁褓流離年十七乃移居雍耽思墳典後至光祿大夫

虞溥字允源父秘為偏將軍鎮隴西溥從父之官專心墳典疆場閱武人爭視之溥未嘗寓目後至鄱陽內史董景道字文博少而好學千里追師所在惟晝夜誦讀

略不與人交通

景道按史無官

徐苗少家貧晝執鉏未夜則吟誦弱冠與弟賈就博士
濟南宋均受業遂為儒宗徵辟並不就

褚陶嘗謂所親曰聖賢備在黃卷中捨此何求州郡辟
不就

孫盛歷秘書監給事中篤學不倦自少至老手不釋卷
荀崧歷右光祿大夫雖衰老而孜孜典籍世以此嘉之
范汪字玄平少孤貧六歲過江依外家庾氏及長好學
庾氏家貧無以資給汪乃廬于園中布衣蔬食燃薪寫

書寫畢讀誦亦遍遂博學多通善談玄理後至安北將軍

范甯為豫章太守既免官家于丹陽猶勤學終年不輟
葛洪字稚川少好學家貧躬自伐薪以買紙墨夜輒寫
書誦習遂以儒學知名徵散騎常侍不就

范宣少尚隱遁加以好學手不釋卷以夜繼日遂博綜
衆書尤善三禮詔徵不就

徐邈姿性端雅勤行勵學博涉名聞後至驍騎將軍

干寶字令升少勤學博覽書記以才器召為著作郎

徐廣為秘書監性好讀書老猶不倦

謝沉少孤事母至孝博學多識明練經史耕耨之暇研
精墳典後至著作郎

紀瞻性靜默少交遊讀書或手自抄寫後至驃騎將軍
王延少孤貧晝則傭賃夜則誦書遂究覽經史皆通大
義後為劉聰金紫光祿大夫

王歡字君厚樂陵人也安貧樂道專精耽學不營產業

嘗丐食誦詩雖家無斗儲意怡如也其妻患之或焚毀其書而求改嫁歡笑而謂之曰卿不聞朱買臣妻耶時

聞者多哂之歡守志彌固遂為通儒

歡史不載官

魏詠之家世貧素而躬耕為事好學不倦後至荊州刺史

車盾恭勤不倦博覽多通家貧不常得油夏日則練囊盛數十螢火以炤書夜以繼日後至吏部尚書

劉敏元字道光勵已修學不以險難改以好星歷陰陽

術數潛心易太玄不好讀史嘗謂同志曰誦書當味義
根何為費功於浮辭之文易者義之源太玄理之門能
明此者即吾師也

王育字伯春少孤貧為人傭牧羊每過學必獻款時有
暇即折蒲學書遂亡失羊為羊主所責育將粥已以償
之同郡許子章敏達之士也聞而嘉之為育償羊給其
衣食使與子同學遂博通經史後至破虜將軍

劉宣字士則元海之從祖朴鈍少言好學修潔師事樂

安孫炎沉精積思不捨晝夜好毛詩左氏傳

劉曷仕李曷遷撫夷護軍雖有政務手不釋卷曷曰卿嗜篇籍以燭繼晝白日且然夜可休息曷曰朝聞道夕死可矣不知老之將至孔聖稱焉曷何人斯敢不如此雖在兵難之中講誦不廢每儒士在門嘗倒屣出迎停寢政事引談經籍尤明斷決時事亦無滯也

張悌少孤貧隨母長於舅氏令其牧羊悌幼而好學事母以孝聞每日必於牧暇採樵二束菜二本一以供母

一以顧人書畫則折木葉學書夜則誦所書

前秦苻朗初為鎮東將軍青州刺史封樂安男不得已起而就官及為方伯有若素士耽翫經籍手不釋卷每談虛語玄不覺日之將夕

宋劉懷肅家世貧窶而躬耕篤學後至淮南歷陽二郡太守

鄭鮮之祖襲為江乘令因居縣境鮮之下帷讀書絕交游之務後至尚書左僕射

王微字景玄瑯琊臨沂人少好學無不通覽嘗住門屋一間尋書玩古如此者十餘年後追贈秘書監

王韶之家貧好學嘗三日絕糧執書不輟父母家人或謂之曰困窮如此何不耕農為求活乎韶之答曰我嘗以典籍自耕耳後至祠部尚書

殷淳高簡寡欲早有清高愛好文義未嘗違捨後至光祿大夫

沈攸之晚好讀書手不釋卷史漢事多所諳憶嘗歎曰

早知窮達有命恨不十年讀書後至郢州刺史

傅隆為光祿大夫歸老在家手不釋卷博學多通特精
三禮謹於奉公嘗手自寫書

南齊王遂之為大中光祿大夫加侍中遂之性率素衣
裳不澣几案塵黑年老手不釋卷

王儉幼有神彩專心篤志手不釋書後為尚書令

沈麟士少好學家貧織簾誦書手口不息及長隱居篤
學不倦遭火燒書數千卷麟士年過八十耳目猶聰明

手自抄寫燈下細書復成二三千卷滿數十篋人以為
養身靜默之所致也

江泌字士清少貧晝日斫屨夜讀書隨月光握卷升屋
後為南中郎行叅軍

陸澄字彥淵少好學博覽無不知行坐眠食手不釋卷
後至散騎常侍

顧歡幼聰慧家貧父使驅田中雀歡作黃雀賦雀食稻
過半父怒欲撻之見賦乃止鄉中有學舍歡貧無以受

業於舍壁後倚聽無遺亡者八歲誦孝經詩論及長篤志好學夕則然松節讀書或然糠自照同郡顧顛之臨縣見而異之遣諸子與游及孫憲之並受經句歡年二十餘更從豫章雷次宗諮玄儒諸義從徵太學博士不就

徐伯珣少孤貧無紙以竹葉甘蔗及地上學書山水暴出漂溺宅舍材鄰皆奔走伯珣累床而止讀書不輟叔父璠之與顏延之友善還詣蒙山立精舍講授伯珣往從學積十年

究尋經史遊學者多依之瑯琊王辟議曹從事不就

虞蘇少好學居貧屋漏恐濕墳典乃舒被覆書書獲全
而被大濕時人以比高鳳

梁主泰少好學手所抄寫二千餘卷

傅昭幼孤為外祖所養十歲於朱雀航賣歷日雍州刺
史袁顛嘗來昭所昭讀書自若神色不動顛歎曰此兒
神情不凡必成佳器司徒建安王休仁聞而悅之因欲
致昭昭以宋氏多故遂不往後至散騎常侍

張纘為秘書郎好學兄緬有書萬餘卷晝夜披讀殆不
輟手秘書郎有四員宋齊以來為甲族起家之選待次
入補其居職例百數十日便遷任纘固求不徙欲遍觀
閣內圖籍帝執四部書目曰君讀此畢乃可言優仕矣
陶弘景未弱冠齊高帝作相引為諸王侍讀除奉朝請
雖在朱門閉影不交外物唯以披閱為務朝儀故事多
取決焉

沈約篤志好學晝夜不輟卷母恐其勞生疾常遣減油

火而晝之所讀夜輒誦之遂博通羣籍能屬文後至侍
中丹陽尹特進

范雲嘗就親人袁紹學晝夜不怠紹撫其背曰卿精神
秀朗而勤於學卿相才也後至右僕射

江革字休映謝朓雅相欽重朓嘗候革時大雪見革弊
絮單席而耽學不倦嗟嘆久之乃脫所著襦并手割半
糲與革充卧具而去後至光祿大夫領步兵校尉

韋愛性清介不妄交游而篤志好學每虛室獨坐游心

墳索而埃塵滿席寂若無人年二十嘗游京師值天子
出游南苑邑里誼誼老幼爭觀愛獨端坐讀書手不釋
卷宗族見者莫不異焉後至寧蜀太守

王瞻字思範年數歲嘗從師受業時有伎經其門同學
皆出觀瞻獨不視習誦如初從父尚書僕射僧達聞而
異之謂瞻父曰太宗不哀寄之此子後至侍中領騎將
軍

蕭琛嘗言少壯有三好音律書酒年長以來二事都廢

唯書籍不衰後至侍中特進

張緬少勤學自課讀書手不輟卷後至御史中丞

陸倕字佐公少勤學善屬文於家庭內起兩間茅屋杜絕往來晝夜讀書如此者數載後至國子博士中庶子褚璠少孤貧篤志好學有才思

殷芸勵精勤學博洽羣書幼而廬江何憲見之深相嘆賞後至通直散騎常侍秘書監

孔子祛少孤貧好學耕耘樵採嘗懷書自隨閑則讀誦勤

苦自勵遂通經術尤明古文尚書後至步兵校尉

沈峻家世農夫至峻好學與舅太史叔明師事宗人沈
鱗士門下積年晝夜自課時或睡寐輒以杖自擊其篤
志如此後至中書通事舍人

司馬筠孤貧好學師事沛國劉歊彊力專精深為歊所
器異後至始興內史

范縝年未弱冠聞沛國劉歊聚徒講說縝往從之卓越不羣
而勤學歊甚竒之親為之冠後至中書郎國子博士

何佟之少好三禮師心獨學彊力專精手不釋卷讀禮
論三百篇略皆上口齊太尉王儉雅相推重後至尚書
左丞

王錫幼而警悟與兄弟受業至應休散嘗獨留不起年
七八歲猶隨母儀興公主入宮高祖嘉其聰敏嘗為朝
士說之精力不倦致損右目公主每節其業為飾居室
雖童稚之中一無所好後至吏部郎中

劉霽家貧與弟杳歆相勵篤學既長博涉多通累官建

康令不拜

任孝恭精力勤學家貧無書崎嶇從人假借每誦讀一遍略無所遺後至燕中書通事舍人

臧嚴孤貧勤學行止書卷不離於手後至鎮南諮議叅軍

鍾嶸與兄岏弟嶼並好學有思理後至晉安王記室

袁峻字孝高早孤篤志好學家貧無書每從人假借必皆抄寫自課日皆五十紙紙數不登則不休息後至員

外散騎侍中

劉峻八歲為魏人所掠徙桑乾峻好學家貧寄人廡下自課讀書嘗燎麻炬從夕達旦時或昏睡藝其髮既覺復讀終於不寐其精力如此齊永明中從桑乾得還自謂所見不博更求異書聞京師有者必往祈借後至荆

州戶曹參軍

庾仲容幼孤為叔父泳所養既長杜絕人事專精篤學晝夜手不輟卷後至黟縣令

張率與陸少玄善少玄家有父澄書萬卷餘率遂得盡
讀其書建武三年舉秀才除太子舍人

司馬聚善三禮少傳家業彊力專精手不釋卷後至晉
安王長史

陳元敬字子恭純孝有風格幼便篤學老而不倦後至
金紫光祿大夫特進

鄭灼家貧抄義疏以日繼夜筆毫盡每削用之灼嘗蔬
食講授多苦心熱若瓜時輒偃卧以瓜鎮心起便誦讀

其篤志如此後至中散大夫

陸瓊初以侯景作逆携母避地于吳縣之北鄉勤苦讀書晝夜不怠遂博學善屬文永定中州舉秀才

沈德威字懷遠少有操行梁太清末遁於天目山築室以居雖處亂而篤學無倦遂治經業後至祠部入隋官至秦王府主簿

江總篤學有辭采家有賜書數千卷總晝夜尋讀未嘗輟手後至尚書令

章華家世農夫至華獨好學與士君子遊處頗覽經史
善屬文侯景之亂乃遊嶺南居羅浮山寺專精習學後
除大市令

歐陽頴長沙臨湘人也父喪家產累積悉讓諸兄州郡辟
頴不應乃廬于麓山寺傍專精習業博通經史年三十其
兄逼令從官起家信武府中兵參軍

袁樞字踐言美容儀性沉靜好讀書手不釋卷至尚書
右僕射

姚察樂於墳籍無所不覩每有製述多用新奇人所未見咸重富博且專志著書白首不倦手自抄撰無時輟輟好研覈古今諱正文字精采流贍後至吏部尚書後魏崔祖虬少而好學下帷讀書不驅競當世舉秀才不就

張袞年七十闔門守靜手執經書刊定得失愛好人物善誘無倦士類以此高之後至給事黃門侍郎

崔玄伯立身雅正與世不羣雖在亂猶屬志篤學不以

資產為意妻子不免飢寒後至吏部尚書

古弼遷尚書令弼雖事務殷湊而讀書不輟

崔逞少好學有文才遭亂孤貧躬耕于野而誦讀不廢
後至御史中丞

宋隱性至孝年十三便有成人之志專精好學不以兵
難易操

游明根雅之從祖弟也幼年遭亂為櫟陽王氏奴主使
牧羊明根以漿壺倩人書字路邊畫地學之長安鎮將竇

瑾見之呼問知其姓名乃告游雅使人贖之教書年十六辭雅歸鄉里於白渠坎為窟讀書積歲雅推薦之太武擢為中書學生寡欲綜習經典文成踐祚為都曹主書帝以其敬慎每嗟美之

常景耽好經史愛玩文辭若遇新異之書殷勤求訪或復貨買不問價之貴賤必以得為期後至儀同三司

房景先字光胄幼孤貧無資從師其母自授毛詩曲禮年十二請其母曰豈可使兄傭賃以供景先也請自求

衣然後就學母哀其小不許苦請從之遂得一羊裘忻
然自足晝則樵蘇夜誦經史自是精勤遂大通瞻後至
步兵校尉領尚書郎

高允少孤夙成有奇度性好文學擔笈負書千里就業
為尚書散騎常侍加光祿大夫年九十餘恂恂善誘誨
人不倦晝夜手常執書吟咏尋覽

李瑾為車騎將軍大司農卿殷州大中正瑾淳謹好學老
而不倦

宋繇少有志尚追師就學閑坐誦書晝夜不倦博通經史諸子羣言靡不覽綜後仕沮渠牧犍官至左丞世祖拜河西王右相

劉芳聰敏過人篤志墳典晝則傭書以自資給夜則讀史終夕不寢後至太常卿

趙逸為中書侍郎性好墳典白首彌勤年踰七十手不釋卷

游肇外寬柔內剛直耽好經傳手不釋書官至尚書右

僕射

李彪字道固家世寒微少孤貧有大志篤學不倦高悅
兄間博學高才家富典籍彪遂於悅家手抄口誦不暇
寢食後至御史中尉

崔光家貧好學晝耕夜誦傭書以養父母後至司徒侍
中

崔休好學涉歷書史公事軍旅之隙手不釋卷後至殿
中尚書

李琰之歷侍中中書侍郎每休閒之際常閉門讀書不
交人事嘗謂人曰吾所以好讀書不求身後之名但得
異見異聞心之所願是以孜孜探討欲罷不能豈為異
日聲名勞七尺軀也此乃天性非爲力强

崔挺少敦學業多所覽究手不釋卷後至北海王詳司
馬

張普惠父暉為齊州中水令隨父之縣受業齊土專心
墳典克厲不息乃還鄉里就程立講習精於三禮兼善

春秋百家之說多所窺覽諸儒稱之後至尚書右丞
祖瑩八歲能誦詩書十二為中書學生好學耽書以夜
繼晷父母恐其成疾禁之不能止嘗密於灰中藏火驅
逐童僕父母寢睡之後燃火讀書以衣被蔽塞窓戶恐
漏光明為家人所覺由是聲譽甚盛後至車騎大將軍
溫子昇初受學於崔靈恩劉蘭精勤以夜繼晷晝夜不
倦後至中書郎

宋世景與弟道與下帷誦讀博覽羣言尤精經義族兄

弁甚重之後至伏波將軍行滎陽太守

北齊李鉉字耳鼎渤海南皮人也九歲入學書急就篇
月餘便通家素貧苦常春夏務農冬乃入學年十六從
李周仁受毛詩尚書張武劉子猛受禮記常山房蚪受
周官儀禮漁陽鮮于靈馥受左氏春秋鉉以鄉里無可師
者遂與州里楊元懿河間宗惠振等結侶詣大儒徐遵
明受業居徐門下五年常稱高等年二十三便自潛居討
論是非用心精苦曾三秋冬不畜枕每至睡時假寐而

已年三十六丁父喪服闋以鄉里寡文籍來遊京師讀所未見書後至國子博士

辛術為東南道行臺尚書少愛文史晚更勤學雖在戎兵手不釋卷

張耀為秘書監奉職恪勤未嘗有過好讀書春秋月一遍時人慕之賈良道趙彥深嘗謂耀曰君研尋左氏豈求服虔杜預之紕繆耶耀曰何為然乎左氏之書備叙言事惡者可以自戒善者可以庶幾故厲已溫習非欲

詆訶古人之得失也

劉晝字孔昭渤海阜城人也少孤貧好學笈從師服膺無倦與儒者李寶鼎同鄉里甚相親愛授其三禮又就馬敬德習服氏春秋俱通大義恨下里少墳典便杖策入都知大府少卿宋世良家多書乃造焉世良納之恣意披覽晝夜不息舉秀才不第終于家

劉逖彭城人也魏末世宗以為開府行參軍遠離鄉家倦於羈旅發憤自勵專精讀書晉陽都會之所霸朝人

士攸集成務於宴集述在遊宴之中卷不離手值有文籍所未見者則終日諷誦或通夜不歸其好學如此亦留心文藻頗工詩詠後至散騎常侍奏門下事

馮偉節少從李寶鼎遊學李重其聰敏嘗試問之多所通解尤明禮傳後還鄉里閉門不出將三十年不問產業不交賓客專精覃思無所不通舉秀才不就

魏收年十五隨父赴邊好習騎射因滎陽鄭伯調之曰魏郎弄戟多少收慙遂折節讀書夏月坐板床隨樹陰

諷誦積年床板為之銳減而精力不輟以文華顯後至
尚書右僕射

後周樂遜字尊賢河東猗氏人弱冠為郡主簿魏正光
中聞碩儒徐遵明領徒趙魏乃就授孝經喪服論語詩
書禮易左氏春秋大義尋而山東寇亂學者散逸遜於
擾攘之中猶志道不倦

樊深字文淵河東猗氏人弱冠好學負書從師於河西
講習五經晝夜不倦後為國子博士性好學老而不怠

朝暮還往嘗據鞍讀書至馬驚墜地損折支體終亦不改

裴漢嘗借人異書必躬自錄本至於疾疢彌年亦未嘗釋卷後至車騎大將軍儀同三司

薛端字仁直河東汾陰人本名沙陁有志操與弟裕勵精篤學不交人事後至基州刺史

宇文測字澄鏡性沉密少篤學每旬月不窺戶牖後至少保

宗慄少聰敏好讀書日夜不倦語輒引古事鄉里呼為小兒學士後至車騎大將軍

沈重字德厚專心儒學從師不遠千里遂博覽羣書仕後梁蕭歸至太常卿

呂思禮好學有文才雖務兼軍國而手不釋卷晝理政事夜則讀書令蒼頭執燭燭燼夜有數升後至都官尚書

薛愷初自孝昌中杖策還雒陽先是愷從祖真度與族

祖安都擁徐充歸魏其子懷雋見愷甚相親善屬爾朱
榮廢立遂還河東至懷雋家不交人物終日讀書手自
抄畧將二百卷唯郡守元襲時相要屈與之抗禮仕西
魏至安東將軍

隋諸葛穎為太子舍人周武平齊不得調杜門不出者
十餘年習周易圖緯蒼雅莊老頗得其要

楊尚希髫齡而孤年十歲辭母請業長安涿郡盧辨見
而異之令入太學專精不倦同輩者皆共推伏後至蒲

州刺史

劉行本起家梁武陵王國常侍遇蕭脩以梁州北附遂與叔父璠歸周寓居新豐每以諷誦為事精力忘疲雖衣食乏絕晏如也後至太子右庶子

楊昇字文殊幼丁父憂及免喪之後絕慶弔閉戶讀書數年之間博覽書記後至吳州總管

李文博性介鯁直好學不倦至於教義名理特所留心每讀書至治亂得失忠臣烈士未嘗不反覆吟翫後至

司隸從事

馬光少好學從事數十年晝夜不息後徵為太學博士
王邵字志學暨乎暮齒篤好經史遺落世事用心既專
性頗恍惚每至對食閉目凝思盤中之肉輒為僕從所
噉邵弗之覺唯責肉少數罰厨人厨人以情白依前閉目伺
而獲之厨人方免笞辱其專固如此後至秘書少監
庾自直潁川人少好學沉靜寡欲至著作佐郎知起居
舍人

房彥謙受學於博士尹琳手不釋卷遂通涉五經解屬
文工草隸雅有辭辯風槩高人後至司隸刺史

劉炫字光伯河間景城人也少以聰敏見稱與信都劉
焯閉戶讀書十年不出交津橋人劉智海家素多墳籍
炫就之讀書經涉十載雖衣食不繼晏如也遂以儒學
知名後為瀛州戶曹從事徧直三省而不得官

盧思道字子行范陽人也思道聰爽俊辨通脫不羈年
十六遇中山劉松為人作碑銘以示思道思道讀之多

所不解於是感激閉戶讀書師事河間邢子才後思道復為文以示劉松松又不能甚解思道乃喟然嘆曰學之有益豈徒然哉因就魏收借異書數年之間才學兼著後至散騎侍郎奏內史侍郎事

劉臻為皇太子學士無吏幹性恍惚耽悅經史終日覃思至於世事多所遺忘

郎茂少敏慧七歲誦騷雅日千餘言十五師事國子博士河間權會受詩書易三禮及玄象刑名之學又就國

子助教長樂張率禮受三傳羣言至忘寢食家人恐茂成病常節其燭燈後至尚書左丞

內史令李德林舉秀異射策甲科拜秘書郎秩滿當遷而固守不調在秘書十餘歲其學業益廣

唐竇威字文蔚扶風平陵人威家世勲貴諸昆弟並尚武藝而威耽翫文史介然自守諸兄哂之謂為書癡

李密多籌筭養客禮賢無所愛恠後更折節下惟耽學尤好兵書誦皆在口師事國子助教包愷愛史記漢書

勵精忘倦愷門徒皆出其下

虞世南性沈靜寡欲篤志勤學少與兄世基俱受學於
吳郡顧野王經十餘年精思不倦或累旬不盥櫛後至
秘書監

徐曠字文遠家貧無以自給其兄林鬻書為事文遠每
閱書於肆不避祁寒暑雨遂覽五經尤精春秋左氏傳
姚思廉吳興武康人性恬靜寡欲終日閉門披閱經史
未嘗言及家事非公事不出門無所造請學有家風博

通前載後至散騎常侍

張行成少師事河間劉炫勤學不倦後至右僕射太子少傅

蕭德言博涉經史尤精春秋左氏傳貞觀中累除著作郎兼弘文館學士德言晚年尤篤志於學自晝達夜畧無厭倦每欲開五經必盥濯束帶危坐對之妻子候問請曰終日如是無乃窮乎德言曰敬先聖之言豈憚如此

路敬淳尤勤學不窺門庭徧覽墳籍後至太子司儀郎
李襲譽好學手不釋卷博涉經史後至同州刺史

裴行儉初以門廕補弘文生累年在館惟閉戶讀書館
司將加薦舉固辭不就左僕射房元齡問其故曰遭隋
季亂私門書籍蕩盡冀在館披閱有所成耳後至吏部
侍郎

裴炎河東人也少補弘文生每休暇諸生多出遊炎獨
觀書不輟後至內史

劉仁軌字正則汴州尉氏人也少恭謹好學遇隋末喪亂不遑專習每行坐所在輒書空畫地由是博涉經史後至文昌左相

馬懷素少師事李善貧無燈燭晝採薪蘇夜燃讀書遂博覽經史解屬文開元中為秘書監兼昭文館學士懷素雖居吏職而篤學手不釋卷

王友貞素好學讀九經皆百遍誨訓子弟如嚴君焉後拜太子中舍許令在家脩道

韋涉中書令安石之子開元初丁父憂居喪過禮自此杜門不出八年于茲與弟斌相勸勵探討墳索不捨晝夜文華當代俱有盛名後至禮部尚書東郡留守

楊綰生而聰慧及長好學不倦博通經史官至中書侍郎平章軍國事

于休烈為工部尚書篤好墳籍手不釋卷以至於終

崔元幹善屬文年近七十好學不倦官歷駕部員外郎

知制誥

陽城字允宗北平人也代為宦族家貧不能得書乃求入集賢院為寫書吏竊官書讀之晝夜不出房經六年遂無所不通

李異字令叔趙郡人少勤學孜孜自課以明經調補華州叅軍應拔萃科授鄆縣尉

蔣仁自少好學雖甚寒暑未嘗釋卷後至秘書監王起官至山南西道節度使自幼及耄手不釋卷

張建章尤好經史聚書至萬卷所居有書樓但以披閱

清淨為事經涉之地無不理焉建章曾齋元載命往渤海遇風濤乃泊其船回及西岸經太宗征遼碑半在水中建章則以帛苞麥屑置于水中摸而讀之不失一字其篤學也如此後至幽州行軍司馬

李谿在省臺日聚書至多手不釋卷時人號曰李書樓仕昭宗時位至宰相

梁孫騰雅好聚書有六經史漢洎百家之言凡數千卷皆簡翰精至披勘詳審得暇即朝夕耽翫曾無少怠官

至左散騎常侍

後漢劉岳初少孤以先人官卑羣從之間最不調兩都喪亂流寓青齊丐食業文厲心苦節至太常卿

晉裴皞容止端秀性急剛直無隱少而好學苦心文翰雖亂離斯瘼手不釋卷後至右僕射致仕

周馮道少純厚好學善屬文不耻惡衣食負米奉親之外唯以披誦咏吟為事雖大雪擁戶凝塵滿席湛如也後至中書令

張昭自歷清顯手不釋卷每得生書以舊有足病必卧
而禮之舉朝服其好學

冊府元龜卷七百九十八

欽定四庫全書

冊府元龜卷七百九十九 宋 王欽若等撰

總錄部

彊記 聰悟

彊記

傳不云乎博文彊識謂之君子蓋有目所暫閱耳所暫聞而成誦于口終身不忘者信乎其彊記也自漢而下能者間出咸性理聰悟機神警邁或博通前籍默識無

謬或詳練故事遽數弗遺以至閱爵里而悉舉其名氏
經國邑而盡志其風土背碑靡失覆墓不誤自非宅粹
精於心術彰敏慧于天性疇能及是哉

漢東方朔年十六學詩書二十二萬言十九學孫吳兵
法戰陣之具鉦鼓之教亦誦二十二萬言凡誦四十四
萬言仕為侍郎

張安世從武帝行幸河東嘗亡書三篋詔問莫能知唯

安世識也識記具作其事後購求得書以相校無所遺失

帝竒其材擢為尚書令

任安字少卿為武功亭長邑中人民俱出獵安嘗為人分麋鹿雉兔部署老小嘗壯劇易處衆人皆喜曰無傷也任少卿分別平有智畧明日復會會者數百人安曰某子甲何為不來乎諸人皆恠其見之疾也位至大司馬

後漢陸續幼孤仕郡為戶曹吏時歲荒民飢困太守尹興使續於都亭賑民饘粥續悉簡閱其民訊以名氏事

畢興問所食幾何續因口說六百餘人皆分別姓字無有差謬

延篤少從潁川堂溪典受左傳旬日能諷之典深敬焉

先賢行狀曰篤欲寫左氏傳無紙堂溪典以廢牋記與之篤以牋記紙不可寫傳乃借本諷之糧盡辭欲歸典曰卿寫傳何故辭歸篤曰已諷之矣典聞之嘆曰嗟乎延生雖復端木聞一知二未足為喻若使尼父更起於洙泗君當顯名七十與游

夏爭匹也後為京兆尹

應奉少聰明自為童兒及長凡所經履莫不暗記讀書五行並下為郡決曹吏行部四十二縣錄囚徒數百千

人及還太守備問之奉口說罪繫名姓坐狀輕重無所

遺脫時人竒之

又曰奉少為上計吏許訓為計掾俱到京師訓自發鄉里在路晝頓暮宿所見

吏賓客亭長吏卒奴僕訓皆密疏姓名欲試奉還都歸示奉奉云前日潁川綸自都亭亭長胡奴名以飲漿來何不在疏坐中皆驚又云奉年二十時嘗詣彭城相袁賀時出行閉門造車匠於內開扇出半面視奉奉即委去後數十年於路見車匠識而呼之

虞延為郡督郵光武東巡路由小黃高帝母昭靈后陵園在焉詔呼延引見問園林之事延占對可觀其陵樹株葉皆識其數俎豆犧牲頗曉其禮

王充家貧無書嘗遊雒陽肆閱所賣書輒能誦憶後同郡謝夷上書薦充才學肅宗詔公車徵病不行

臧旻自匈奴中郎將徵拜議郎還京師太尉袁逢問其西域諸國土地風俗人物種類旻具答言西域本三十六國復分為五十五稍散至百餘國大小道里遠近人數多少風俗燥濕山川草木鳥獸異物名種不與中國同者口陳其狀手畫地形逢竒其才嘆息曰雖班固作西域傳何以加此

尹默通諸經史又專精於左氏春秋自劉歆條例鄭衆
賈逵父子陳元方服虔注說咸畧誦述不復按本後拜
大中大夫

禰衡

公孫瓚

王

祭

司馬防

隗

禧

夏侯榮

已上事節附在此卷末

蜀張松為劉璋益州從事識達精果有才幹劉璋遣詣
曹公曹公不甚禮松主簿楊脩深器之白公辟松公不
納脩以公所撰兵書示松松飲宴之間一看便闔誦脩
以此益異之

何祇補成都令使人投算祇聽其讀而心計之不差升合其精如此後為都督從事時諸葛亮用法峻密陰聞祇遊戲放縱不勤所職當亮往錄獄衆人咸為祇懼祇密聞之夜張燈火見囚牘諸解狀諸葛亮晨往祇悉闕誦答對解釋無所疑滯亮甚異之

胡潛字公興雖學不沾洽然卓犖彊識祖宗制度之儀喪記五服之數皆指掌畫地舉手可採許慈並為博士吳朱桓性彊識與人一面數十年不忘部曲萬口妻子

盡識之後領青州牧

闕澤字德潤好學居貧無資嘗為人傭書以供紙筆所
寫既畢誦讀亦遍察孝廉除錢塘長

謝承字偉平博學洽聞嘗所知見終身不忘史不書官
位

晉劉輿為東海王越所召輿密視天下兵簿及倉庫牛
馬器械水陸之形皆默識之是時軍國多事每會議自
潘滔以下莫知所對輿既見越應機辯畫越傾腴酬接

即以為左長史

刁協字元亮少好學經籍博聞強記釋褐濮陽王文學
太興初為尚書令

王珣為桓溫主簿軍中機務並委珣焉文武萬人悉識
其面

范宣字宣子陳留人也言談未嘗及老莊客有問人生
與憂俱生不知此語何出珣曰出莊子至樂篇客曰君
言不讀老莊何由識此宣笑曰小時嘗一覽時人莫之

測也太尉郝鑒命為主簿詔徵太學博士散騎郎並不
就

張華為司空彊記默識四海之內若指諸掌武帝嘗問
漢宮室制度及建章千門萬戶應對如流聽者忘倦畫
地成圖左右屬目帝甚異之時人比之子產

謝安為太保初以晉自過江遂亡輿輦之制度率意造
焉及破苻堅於淮上獲京都舊輦形制無爽大小如一
時人服其精記

吳熹初出身為領軍府白衣吏少知書領軍將軍沈演之使為起居注所寫既畢閣誦略皆上口演之嘗作讓表未奏失本熹經一見即便寫赴無所漏脫演之甚愛之因此涉獵漢史頗見古今演之門生諸童民人為主書薦熹為主書史進為主圖令史

南齊蕭惠開拜益州刺史嚴用威刑蜀人號曰卧虎明識過人嘗有三千沙門一閱其名退無所失

梁陸倕所讀書一遍必誦於口嘗借人漢書失五行志

四卷乃暗寫還之略無漏脫後為中庶子加給事中揚州大中正復守太常卿中正如故

任孝恭精力勤學家貧無書崎嶇從人假借每讀一編諷誦略無所遺高祖聞其才學召入西省撰史初奉朝請進直壽光省為司文郎俄兼中書通事舍人

劉子諒少好學有文才尤博識晉代時人號曰皮裏晉書歷官著作郎

張緬明後漢及晉代諸家客有執卷質緬者隨問便對

略無遺失起家秘書郎

劉覽為尚書左丞性聰敏尚書令史七百人一見並記
姓名

謝蘭阮孝緒之甥孝緒以其有至性謂之曾子稍授以
經史過目便能諷誦孝緒每曰吾家陽元也後吏部尚
書蕭子顯表其至行擢為王府法曹行軍參軍

何憲廬江瀟人博涉該通羣籍畢覽天閣寶秘人間散
逸無脫漏焉任昉劉渢共執秘閣四部書試問其所知

自甲至丁書說一事并敘述作之體連日累夜不竟所遺位本州別駕國子博士

臧嚴為浙東王宣惠輕車府叅軍兼記室嚴於學多所暗記尤讀漢書諷誦略皆上口王嘗自執四部書目以試之嚴自甲至丁卷中各對一事并作者姓名通無遺失其博洽如此

劉顯好學博涉多通任昉嘗得一篇缺簡書文零落莫能識者顯云是古文尚書刪逸篇昉簡周書果如其說

約命駕造馬於坐策顯經史十事顯對其九顯問其五

約對其二陸倕聞之嘆曰劉郎差可人雖吾家平原詣

張壯武王粲謁蔡伯喈必無此對

陸機為平原內史先是與弟雲同造壯武

郡公張華華素重其名如舊相識王粲徙長安蔡邕見而異之伯喈邕字也

累遷中書侍郎

陳陳凝少孤貧性質直彊勇力封永循縣開國侯尋授

通直散騎常侍中領軍

陸瑜幼長讀書晝夜不廢聰明彊記一覽無復失累遷

永陽王文學太子洗馬中書舍人

後魏韓顯宗有才學沙門法撫三齊稱其聰悟嘗與顯宗較試抄百餘人名讀一遍隨即覆呼法撫猶有一二舛謬顯宗了無誤錯法撫嘆曰貧道生平以來唯服郎耳舉秀才對策甲科除著作佐郎

楊大眼為將軍雖不學嘗於人讀書坐而聽之悉皆記識令作露布皆口授之終平東將軍

胡叟披讀羣籍再閱於目皆誦於口朝廷以其機識拜武威將軍

楊機為雒陽令凡訟訟者一經其前後皆識其名姓并
記事理世咸異之遷鎮軍將軍

闕駟博通經傳聰敏過人三史羣言經目則誦時人謂
之宿讀沮渠蒙遜甚重之拜秘書考課郎中

高謙之專意經史天文筭曆圖緯之書多所該涉日誦
數千言釋褐奉朝請加宣威將軍

常景字永昌少聰敏初讀論語毛詩一受便覽廷尉公
孫良舉為協律博士

邢邵十歲便能屬文雅有才思聰明強記日誦萬言族
兄鬱有文鑒謂子弟曰宗室中有此兒非常人也少在
雒陽會天下無事專以山水遊宴為娛不暇勤業嘗霖
雨乃讀漢書五日略能徧記之後因飲譁倦方廣尋經
史五行俱下一覽便無所遺嘗與右北平陽固河東裴
伯茂從兄梁河南陸道暉等至北海王昕舍宿飲相與
賦詩凡數十首皆在主人奴處旦日奴行諸人求詩不
得邵皆為誦之諸人不可認詩者奴還得本不誤一字

諸人方之王粲後為衛將軍國子祭酒

李神風骨頽秀舉博學多聞朝廷舊章及人倫氏族多
所諳記仕至驃騎大將軍儀同三司

祖瑩年十二為中書學士時中書博士張天龍講尚書
選為都講生徒悉集瑩夜讀書勞倦不覺天曉催講既
切遂誤持同房生趙郡李怡曲禮卷上座博士嚴毅不
敢還取乃置曲禮於前誦尚書三篇不遺一字講罷李
怡異之向博士說舉學盡驚

北齊王琳雖無學業而彊記內敏軍府佐吏千數皆識其姓名自梁歸齊除驃騎大將軍進封巴陵郡王

楊愔幼聰敏從父兄黃門侍郎昱嘗與十餘人賦詩愔一覽便誦無所遺失愔典選聰記彊識半面不忘每有所召問或單稱姓或單稱名無有誤者後有選人魯漫漢自言猥賤獨不見識愔曰卿前在元子思坊騎秃尾草驢經過見我不下以方麴障面我何不識卿漫漢驚服又調之曰名以定體漫漢果自不虛後為尚書令拜

驃騎大將軍

裴諏之字士正少好學釋褐太學博士嘗從常景借書百卷十許日便返景疑其不能讀每卷策問應答無遺景歎曰應奉五行俱下襴衞一覽便記今復見之於裴生矣

祖珽為神武開府倉曹參軍神武口授珽三十六事出而疏之一無遺失大為僚類所賞

刁柔字子溫少好學綜習經史尤留心禮儀性彊記至

於氏族內外多所諳悉天保除國子博士

馮子琮性聰敏涉獵書傳為孝昭領軍府法曹典機密攝庫部孝昭曾閱簿領試令口陳子琮闇對無有遺失唐邕初為文宣大將軍府參軍後文宣頻年出塞邕必部從專掌兵機每識悟閑明承受敏速自督將以還軍吏以上勞效由緒無不諳練每有顧問占對如響或於御前簡閱雖三五千入邕多不執文簿暗唱官位姓名未嘗謬誤文宣又嘗對邕白太后云唐邕分明彊記每

有軍機大事手作文書口且處分耳又聽受實是異人
後周韓果為都督從太祖征討果性彊記兼有權略所
之處山川形勢輒能記憶

長孫紹遠魏太師稚之子雅好墳籍聰慧過人時稚作
牧壽春紹遠年甫十三稚管記王碩聞紹遠彊記心以
為不然遂白稚曰伏承世子聰慧之姿發於天性目所
一見誦之於口此既歷世罕有竊願驗之於是命紹遠
試焉讀月令數紙纔一遍誦之若流自是碩乃嘆服累

遷殿中尚書錄尚書事孝閔踐祚封上黨公

柳慶幼聰敏有器量博涉羣經不治章句好飲酒閑於
占對年十三因暴書父習謂慶曰汝雖聰敏吾未經特
試令於雜賦集中取賦一篇千有餘言慶立讀三遍便
即誦之無所遺漏保定中為司會

裴漢字仲霄操尚宏雅聰敏好學嘗見人作百字詩一
覽便誦後魏孝文初解褐員外散騎侍郎

韋師雅為宇文護賓曹參軍知諸番風俗及山川險易

其有夷狄朝貢師雅必接對論其國俗如視諸掌夷人驚服無敢隱情格高下亦如是卒為揚州功曹

蔣人為右拾遺史館脩撰德宗嘗幸凌烟閣見左壁頽剝上有殘缺文記每行可辨三五字命錄之以問宰臣卒然無以對遽召人訪之對曰此聖歷年侍臣圖贊也暗諷不失一字宰臣上奏德宗嘆曰虞世南暗寫列女傳無以加也

劉迺聰穎志學暗記六經日數千言為給事中終朱泚

之亂

陳諫彊記洽聞人罕及之王叔文之黨量移通州刺史
卒

馬嘉運為太學博士性聰瞻異於衆人耳目所涉終身
不忘尤善論難

梁敬翔為樞密使開平三年宴宰臣扈從官新授西路
行營行軍司馬崔公實時劉知俊西討鄜延又傳檄銀
夏甚為邠岐寇黨侵擾帝深憂其未濟中宴顧問侍臣

翔承旨而對剖析山川險要郡邑虛實兵糧多少悉以條奏如素講搆左右莫不驚其聽悟人罕能及帝嗟賞晉鄭琮太原人始事唐武皇為左院軍小校屢有軍功莊宗在河上為馬步都虞候戎伍之事一覩不忘凡所詰問應答如流故所在知名唐同光末從明宗伐魏州時軍情有變明宗退守魏縣未知趨向安重誨將徵兵於四方琮在帳中歷數諸道屯軍及主將姓名附口傳檄相次而至

聽悟

語曰生而知之者上也學而知之者次也誠哉聽悟之性天縱之能故世之所希矣若乃思理周物警慧過人耳目口手不相參涉畫誦數聽無所差忒賦古詩而達其意聞庾音搜隱辭也見國語辭而究其理懸解默識洞察其精微屈指心討盡發其疑謬故為稠人之所推服惇史之所流傳至如過街頴悟靡虞漏師致不密而失身者亦士子之攸戒也

叔向晉大夫也初諸侯伐秦及涇莫濟叔向見魯叔孫

穆子曰諸侯謂秦不恭而討之及涇而止於秦何益穆

子曰豹

豹穆子名也

之業在匏有苦葉矣不知其他叔向退

召舟虞與司馬曰夫苦匏不材於人共濟而已魯叔孫賦匏有苦葉必將涉矣具舟除隧不共有法

范燮為晉大夫有秦客廋辭於朝大夫莫之能對也燮

知三馬

解其
三事

顏回字子淵孔子弟子也子謂子貢曰女與回也孰愈

愈猶勝也對曰賜也何敢望回也聞一以知十賜也聞一

以知二又子曰回也非助我者也於吾言無所不說

助益

也言回聞言即解無所發起增益於已

卜商字子夏孔子弟子也子夏問巧笑倩兮美目盼兮

素以為絢兮何謂也

倩笑貌盼動目貌絢文貌此上二句在衛風碩人之二章其下一句

逸子曰繪事後素

繪畫文也凡畫繪先布衆色然後以素分布其間以成其文喻美女雖有

倩盼美質亦須禮成也

曰禮後乎

孔子言繪事後素子夏聞而解知以素喻禮故曰禮後乎

子曰商也始可與言詩已矣

騶忌子以鼓琴見齊威王騶忌子見三月而受相印淳
于髡見之曰善說哉髡有愚志願陳諸前騶忌子曰謹
受教淳于髡曰得全全昌失全全亡騶忌子曰謹受令
請謹毋離前淳于髡曰豨膏棘軸所以為滑也然而不
能運方穿騶忌子曰謹受令請謹事左右淳于髡曰弓
膠析幹一作乾所以為合也然而不能傳合疏罅騶忌子
曰謹受令請謹自附於萬民淳于髡曰狐裘雖弊不可
補以黃狗之皮騶忌子曰謹受令請謹擇君子毋雜小

人其間淳于髡曰大車不較不能載其常任琴瑟不調不能成其五音騶忌子曰謹受令請謹脩法律而督姦吏淳于髡說畢趨出至門面其僕曰是人者吾與之微言五其應我若響之應聲是人必封不久矣新序曰齊稷下先生

喜議政事騶忌既為齊相稷下先生淳于髡之屬七十人皆輕騶忌淳于髡之徒禮踞騶忌之禮卑淳于髡等稱騶忌知之如應響淳于髡等辭誣而去騶忌之禮踞淳于髡之禮卑故所以尚干將莫邪者貴其立斷也所以尚騶驥者為其立至也必且歷日曠久則絲篔能挈石駕馬亦能致遠是以聰明捷敏人之美才也

居暮年封以下邳號曰成侯

後漢應奉字世叔才敏善諷誦自為童兒及長凡所經履莫不暗記故世稱應世叔讀書五行俱下位司隸校尉

楊脩好學有俊才為丞相曹公主簿用事曹氏及曹公自平漢中欲因討劉備而不得進欲守之又難為功護軍不知進止何依曹公於是出教唯曰雞肋而已外曹莫能曉之獨曰夫雞肋食之則無所得棄之則如可惜公歸計決矣乃令外白稍嚴曹公於此迴師脩之能決

幾多如此類又嘗出行籌曹公有問外事乃逆為答記
勅守舍兒若有令出依次通之既而果然如是者二曹
公恠其速使廉之知狀

蜀費禕為尚書令于時戰國多事公務煩猥禕識悟過
人每省讀書記舉目暫視已究其意旨其速數倍於人
終亦不忘

吳呂蒙少不脩書傳每陳大事嘗口占為牋疏位南郡
太守封孱陵侯

顧譚每省簿書未嘗下籌徒屈指心計盡發疑謬下吏
以此服之加奉車都尉

晉范喬字伯孫友人劉彥秋夙有聲譽嘗謂人曰范伯
孫體應純和理思周密吾每欲錯其一事而終不能

阮瞻字千里性清虛寡欲自得於懷讀書不甚研求而
默識其要遇理而辯辭不足而旨有餘永嘉中為太子
舍人

宋謝晦為太尉參軍高祖嘗訊囚其旦刑獄參軍有疾

晦代之於車中一覽訊牒催促便下相府多事獄繫殷
積晦隨問酬辨曾無遺謬高祖竒之即日署刑獄賊曹
殷景仁為中書侍郎學不為文敏有思致口不談義深
達玄理

劉穆之為左僕射領監軍中軍二府軍同將領引選內
總朝政外供軍旅決斷如流事無壅滯目覽詞訟手答
牋書耳行聽受口兼酬應不相參涉

沈璞善屬文時有憶識之功尤練究萬事經目過耳人

莫能欺仕至淮南太守

南齊王融少而神明警慧博涉有文才舉秀才仕至太子舍人

梁王訓字懷範幼聰警有識量徵士何喬一見奇之遷侍中終於位

周捨字昇逸父顥齊中書侍郎有名于時捨幼聰穎顥異之臨卒謂曰汝不患不富貴但當將之以道德既長博學多通尤精義理善誦書背文誦說音韻清辯起家

齊太學博士

陶弘景為人圓通謙謹出處冥會心如明鏡遇物便了
言無煩糾有亦輒覺齊高帝作相引為諸王侍讀除奉
朝請辭祿而去

蔡徵為中書令陳平隨例入關隋文帝聞其敏贍召見
顧問言輒會旨

後魏李預字元顓少為中書學生聰敏彊識涉獵經史
胡叟少聰慧學不師受友人勸之叟曰先聖之言精義

入神者其唯易乎猶謂可思而過半末世腐儒粗別剛柔之位寧有探賾未兆者哉就道之義非在今矣仕至武威將軍

程駿字麟駒少孤貧師事劉昞性機敏好學晝夜無倦昞謂門人曰舉一隅而以三隅反者此子亞之也始拜著作郎

陳竒河北人少孤家貧齟齬聰識有夙成之美性氣剛亮與俗不羣為儒不用于世

邢臧加安東將軍為特進博學有藻思曾共讀迴文集
臧獨先通之

北齊魏收為太子少傅安德王延宗納趙郡李祖收女
為奴後帝幸李宅宴而妃母宋氏薦二石榴於帝前問
諸人莫知其意帝投之收曰石榴房中多子王新妃母
欲子孫衆多帝大喜詔收卿還將來仍賜收美錦二疋
邢邵字子才聰明強記廣尋經史五行俱下累遷尚書
令加侍中

庾信幼而俊邁聰敏博覽羣經

隋薛胥字昭玄河東汾陰人也胥少聰明每覽異書便曉其義嘗嘆訓註者不會聖人深旨輒以意辨之諸儒莫不稱善襲爵文成郡公為兗州刺史有善政

李德饒少敏聰好學有至性宗黨咸敬之弱冠為校書郎仍直內史省參事文翰

劉炫字光伯河間景城人也少以聰敏見稱與信都劉焯閉戶讀書十年不出炫眸子精明視日不眩默識強

記莫與為儔左畫方右畫圓口誦目數耳聽五事同舉
無所遺失初為戶曹從事

張虔雄少有才器秦孝王俊為秦州總管選為法曹參
軍王嘗親按囚徒虔雄誤不持狀口對百餘人皆盡事
情同輩莫不嘆焉

唐裴矩襁褓而孤博聞強記雅有智略善應對尤達政
呂才博州清平人少好學善陰陽方伎之書貞觀初太
子左庶子杜正倫太常少卿祖孝孫表薦之詔令直弘

文館太宗嘗覽周武帝所撰三局象經不曉其旨太子
洗馬蔡允恭年少時嘗為此戲太宗召問亦廢而不通
或稱才有敏思召使問焉才尋繹一宿便作圖解允恭
覽之依然記其舊法與才正同才由是知名

歐陽詢雖貌甚寢陋而聰悟絕倫讀書數行俱下博覽
經史尤精三雅終司禮卿判納言事

楊綰清識過人至如往哲微言五經奧義先儒未悟者
綰一覽究其精理

袁滋陳郡汝南人弱歲彊學以外兄通州刺史元結有
重名往依焉每讀書懸解旨奧結甚重之遷河南觀察
使卒

郝士美字和夫父純士美少好學博涉善記覽父友顏
真卿蕭穎士輩嘗與之討論經傳應對如流既而相謂
曰吾曹異日當交於二郝之門矣卒忠武軍節度使

後唐蕭頊字子澄京兆萬年人故相倣之孫京兆廩之
子頊幼聰悟善屬文昭宗朝擢進士第太常卿太子少

保致仕卒

册府元龜卷七百九十九